

选举典

選舉典第五十卷

薦舉部總論

易經 泰卦

初九拔茅茹以其彙征吉

程傳

君子之進必與其朋類相牽援如茅之根然拔其一則牽連而起矣

君子之進必以其類不唯志在相先樂於與善實乃相賴以濟故君子小人未有能獨立不賴朋友之助者也自古君子得位則天下之賢萃於朝廷同志協力以成天下之泰小人在位則不肖者並進然後其黨勝而天下否矣蓋各從其類也

書經 周書周官

推賢讓能庶官乃和不和政厯舉能其官惟爾之能稱匪其人惟爾不任

傳

所舉能修其官惟亦

汝之功能舉匪其人亦惟汝之不勝其任

大臨川王氏曰

道二義利而已推賢讓能所以爲義大

臣出於義則莫不出於義此庶官所以不爭而和蔽賢害能所以爲利大臣出於利則莫不出於利此庶官所以爭而不和庶官不和則政必雜亂而不理矣稱亦舉也所舉之人能修其官是亦

爾之所能舉非其人是亦爾不勝任古者大臣以人事君其責如此

禮記 儒行

儒有內稱不辟親外舉不辟怨程功積事推賢而進達之不望其報君得其志苟利國家不求富貴其舉賢援能有如此者

疏

此明儒者舉賢能之事稱舉也不辟親舉人以理若祁奚舉子祁午不

辟怨若祁奚舉讎人解狐也儒者欲舉人之時必程效其功積累其事知其事堪可乃推而進達之不妄舉人也君任此儒輔助其君使君得其志意所欲皆成此儒者推賢達士無所求爲唯苟在利益國家不於身上自求富貴也

漢王符潛夫論 考績

纂

選茂才孝廉賢良方正惇樸有道明經寬博武猛治劇此皆名自命而號自定羣臣所當盡情竭慮稱君詔也今則不然侍中博士諫議之官或處位歷年終無進賢嫉惡拾遺補闕之語而貶黜之憂羣僚舉士者或以頑魯應茂才以桀逆應至孝以貪饕應廉吏以狡猾應方正以諛諂應直言以輕薄應敦厚以空虛應有道以囂閭應明經以殘酷應寬博以怯弱應武猛以頑愚應治劇名實不相

副求貢不相稱富者乘其材力貴者阻其勢要以錢多爲賢以剛強爲上凡在位所以多非其人而官聽所以數亂荒也古者諸侯貢士一適謂之好德載適謂之尙賢三適謂之有功則加之賞其不貢士也一則黜爵載則黜地三黜則爵土俱畢附下罔上者刑與聞國政而無益於民者斥在上位而不能進賢者逐其受事而重選舉審名實而取賞罰也如此故能別賢愚而獲多士成教化而安民氓三有於世皆致太平

梁劉勰新論 薦賢

國之需賢譬車之恃輪猶舟之倚楫也車摧輪則無以行舟無楫則無以濟國乏賢則無以理國之多賢如託造父之乘附越客之舟身不勞而千里可期足不行而蓬萊可至朝之乏賢若鳳虧六翮欲望背磨青天臆衝絳煙終莫由也峻極之山非一石所成凌雲之榭非一木所構狐白之裘非一腋之毳宇宙爲宅非一賢所治是以古之人君必招賢搜隱人臣則獻士舉知唐昇二八流睦睦之風周保十亂播濟濟之詠仲尼在衛趙鞅折謀于木處魏秦人罷兵宮奇未亡獻公不侵子玉猶存文公側坐以此而言則立政致治折衝厭難者舉賢之效也夫連城之壁瘞影荆山夜光之珠潛輝

鬱浦玉無翼而飛珠無脛而行揚聲於章華之臺炫燿於綺羅之堂者蓋人君之舉也賢士有脛而
不肯至殆蠹材於幽岫毀跡於柴壘者蓋人不能自薦未有爲之舉也古人競舉所知爭引其類才
苟適治不問世胄智苟能謀奚妨秕行昔時人君拔奇於困虜擢能於屠販內薦不避子外薦不避
讎身受進賢之賞名有不朽之芳昔子貢問於孔子曰誰爲大賢子曰齊有鮑叔鄭有子皮子貢曰
齊無管仲鄭無子產乎子曰吾聞進賢爲賢非賢爲不肖鮑叔薦管仲子皮薦子產未聞二子有所
舉也進賢爲美逾身之賢矧復抑賢者乎故黔息碎首以明百里北郭刎頸以申晏嬰所以致命而
不辭者爲國薦士滅身無悔忠之至也德之難也臧文仲不進展禽仲尼謂之竊位公孫弘不引董
生汲黯將爲妬賢虞丘不薦叔敖樊姬貶爲不肖東閭不達髦士後行不正於路歸爲國入寶不如
能獻賢獻賢受上賞蔽賢蒙顯戮斯前識之良規後代之明鏡矣

冊府元龜 奉使論薦

夫輜軒之使巡郡國而采謠俗蓋中古之制也非有精敏之識公忠之節固不得預茲選焉乃有高
視廣聽簡才擇能或觀其表而知其賢或聞其言而壯其志或著尤異之績或馳清白之譽或當官

強毅寇盜靡興或布政寬和黎民用乂以至敦固其行溫麗其文偃息乎衡茅隱遁乎林壑咸用推薦揚于王庭卒能叶力事經亮采邦國爲時俊傑耀焯來裔知人之鑑於是乎在夫如是則勞之以四牡之詠褒之以上賞之明不爲覲覲矣

內臣薦賢

古者稽象緯建官名爰設內臣用謹宮戒秦漢仍襲親任以隆傳近帷幄之中受宣幾密之命其有竭節幹用勤心納忠夙懷永圖克蘊明識推擇髦俊以揚于王庭薦述勳賢用熙乎帝載致國富良士野無遺材經濟大猷翊亮鴻業所以上應四星之象者其在是乎

牧守薦賢

國有進賢之令易稱彙征之吉蓋淑人君子志不掩善義從公共冀得英哲以奉其上者也夫十室之邑必有忠信三人同行必有我師況乎百城共治萬夫觀政按察封部親撫民俗者哉至乃節行純正才譽彰著名迹韜映鄉里推服或屬吏之善治或令族之久廢咸能特達慰薦周旋稱述揚于王庭舉不失德傳曰惟善人能舉其類豈虛語也哉

陪臣薦賢

夫十室之邑必有忠信三人同行厥有我師舉爾所知惟君子之不比各於其黨見士庶之相讓若乃春秋務戰之世敵國急賢之際而有處大夫之列挾霸王之術以尊其主者何嘗不勤接士類汲引材智推轂靡遺於後進拔茅乃至彙征大則讓卿宰之位小則備家陪之列或以素敦友善夙知隱滯或以方在羈旅久爲僕御並加推獎俾之效用至於舉讎取盜曾無嫌間自非深於知人忠於事上者其能若是乎

大學衍義補 崇推薦之道

易泰初九拔茅茹以其彙征吉 臣按進一君子則衆君子進進一小人則衆小人進此泰之初九所以有拔茅茹以其彙之象也夫致泰之道亦多端矣而作易聖人必以是而繫於一卦之初者以見人君欲裁成輔相天地以左右乎生民者非得衆君子以爲之佐不可以成泰功也此致治者所以必慎於用人專於委任以致夫泰治而又崇推薦之道以保其泰於悠久焉

周官曰推賢讓能庶官乃和不和政厯舉能其官惟爾之能稱匪其人惟爾不任 臣按有虞之朝

命禹爲百揆而禹則遜之稷契臯陶命垂爲共工而垂則遜之殳斨伯與益之遜於朱虎熊羆伯夷遜於囂龍噫君以其人爲賢能而用之而其人不自賢不自能而推之賢讓之能其相與和穆也如此此百官和於朝而庶績所以咸熙也歟成王仰惟唐虞建官之意而時若之而以推賢讓能望其臣蓋欲其效虞廷之九官濟濟相讓也而又戒之曰舉能其官惟爾之能稱匪其人惟爾不任其切望之也深矣

春秋穀梁傳曰學問無方心志不通身之罪也心志旣通而名譽不聞友之罪也名譽旣聞有司不舉有司之罪也有司舉之王者不用王者之過也臣按此言則爲臣者見賢而不舉爲君者其臣舉賢而不能用鈞爲有失

左傳襄公三年祁奚請老晉侯問嗣焉稱解狐其讎也將立之而卒又問焉對曰午也可於是羊舌職死矣晉侯曰孰可以代之對曰赤也可於是使祁午爲中軍尉羊舌赤佐之君子謂祁奚於是能舉善矣稱其讎不爲諂立其子不爲比舉其偏不爲黨解狐得舉祁午得位伯華得官建一官而三物成能舉善也夫唯善故能舉其類詩云維其有之是以似之祁奚有焉臣按他書有曰祁奚爲

大夫請老晉君問孰可使嗣對曰解狐可君曰非子之讎乎對曰君問可非問讎也又問孰可以爲國尉對曰午也可君曰非子之子乎對曰君問可非問子也君子謂祁奚外舉不避仇讎內舉不避親戚可謂至公矣其言比左氏尤爲明白至其所謂公之一言誠人臣舉賢輔君之要道也解狐與荆伯抑爲怨簡子問於狐曰孰可以爲上黨守對曰荆伯抑可簡子曰非子之讎乎對曰臣聞忠臣舉賢不避仇讎其廢也不阿親近簡子曰善遂以荆伯抑爲守 臣按先儒有言凡人避嫌者皆內不足也又曰恩讎分明非有德者之言況人臣事君莫大於薦賢爲國苟以親仇之故而有所避就焉則其人可知矣

論語仲弓爲季氏宰問政子曰先有司赦小過舉賢才曰焉知賢才而舉之曰舉爾所知爾所不知人其舍諸 臣按聖人言雖至近上下皆通孔子此言雖爲仲弓爲宰而發然推而廣之使人君之治天下在朝之臣各舉其所知之賢才則人人所知者皆舉而用之而天下之賢才無遺者矣

孟子曰言無實不祥不祥之實蔽賢者當之 臣按天生賢才以爲君用人能引而進之其爲祥也

大矣媚疾之人蔽之而不容其進非但不祥於其身國而不幸有斯人豈非大不祥哉漢詔有云

蔽賢蒙顯戮以是不祥之人投諸豺虎有北可也

荀卿曰下臣事君以貨中臣事君以身上臣事君以人臣按或人問報國孰爲大曰薦賢爲大蓋竭一身之智力其效少竭衆人之智力其效多由是以觀則人臣之所以事其君者其高下可知矣

漢武帝詔曰朕深詔執事興廉舉孝庶幾成風紹休聖緒夫十室之邑必有忠信今或至闔郡不薦一人是化不下究而積行之君子壅於上聞也且進賢受上賞蔽賢蒙顯戮古之道也其議不舉者罪有司奏不舉孝不奉詔當以不敬論不察廉不勝任也當免臣按未用之賢其進與否在公卿大夫之見任者後世立法因其所舉賢否而坐其舉主則有矣未有以賢之不進而誅其見任者以責其必進者也漢去古未遠故其詔令之頒猶有古意存焉

魏明帝時士人多務進趨廉遜道缺劉實著崇讓論以矯之其略曰古者聖王之化天下所以貴讓者欲其出賢才息爭競也夫人情莫不皆欲己之賢故勸令讓賢以自明故讓道興賢能之人不求而自至矣至公之舉自立矣百官具任爲百官之副亦具矣一官缺擇衆官所讓最多者而用之審

之道也在朝之士相讓於上下皆化之推賢讓能之風從此生矣夫在官之人其中賢明者亦多矣豈皆不知讓賢爲貴耶直以時皆不讓習以成俗故不爲耳 臣按唐宋舉官自代之制蓋本實之此論非獨可以見其人材用之實亦足以崇推讓之風焉

唐狄仁傑薦張柬之姚元崇桓彥範敬暉等數十人率爲名臣或謂仁傑曰天下桃李悉在公門仁傑曰薦賢爲國非爲私也 張說喜推藉後進善用人之長多引天下知名士以佐佑王化粉澤

典章成一王法始知進賢院嘗薦張九齡可備顧問說卒上思其言召爲祕書少監集賢院學士

臣按爲大臣者皆能如狄仁傑張說之薦賢其爲國家治道之助多矣李克曰達觀其所舉二臣之所舉如此則其人之賢可知也已

崔祐甫爲相薦舉惟其人不自信畏推至公以行德宗嘗謂之曰人言卿所用多涉親故何也對曰臣爲陛下擇百官不敢不詳慎苟平生未之識何以諳其才行而用之 司馬光曰用人者無親疎

新故之殊惟賢不肖之察其人未必賢也以親故而取之固非公也苟賢矣以親故而舍之亦非公也天下之賢非一人所能盡若必待素識而用之所遺亦多必也舉之以衆取之以公而已不

置毫髮之私於其間則無遺才曠官之病矣

文宗時中書門下奏請京兆河南尹及天下刺史各於本府本道常選人中擇堪爲縣令司錄錄事參軍人具課績才能聞薦如刺史所舉併兩人得上下考者就加爵秩在任年考已深者優與進改如犯贓至一百貫已下者舉主量削階秩一百貫已上者移守僻遠小郡 臣按人之難知而節之易變者莫如利今日不取安保其他日之皆不取哉此事不取安保其他事之皆不取哉人固難保矣而所以坐人罪者又未必皆得其實比連坐舉主之法名雖美而實未易行也

五代周世宗令翰林學士兩省舉令錄除官之日仍署舉者姓名若貪穢敗官並當連坐 胡寅曰保任天下之至難也夫中人以上不萬一焉中人固不易得矣中人以下滔滔是也迫禍難處困窮臨勢利怵交黨此改行易守之會也中人者一出一入焉忍與不忍敢與不敢相權于中未至於其忍而不敢之心勝怵迫甚矣不忍而敢之心決此人情之大常物理之必至也誠知其人今不爲是安知其他日渝與不渝也而況其下者乎故連坐之法似美而實弊似美故其初激昂實弊故其終廢格若曰吾姑嚴爲之防爾則奸人窺之其弊益甚然則奈何曰人君惟典學明道識

拔真賢以爲輔相則有成材之具得人之方如儲木於山育魚於淵惟君所取此非一日之力也
立法保任苟給目前策之下也 臣按胡寅所謂人君典學明道識拔真賢以爲輔相則有成
材之具得人之方此推本反己之論

宋太宗雍熙二年令翰林學士兩省御史臺尙書省官各於京官幕職州縣中舉可升朝者一人端
拱三年令宰相以下至御史中丞各舉朝官一人爲轉運使 臣按宋朝內外官皆責令在廷大臣
舉薦不專用選法也

端拱四年令內外官所保舉人有變節踰濫者舉主自首原其罪 臣按舉主連坐之法行之久矣
而此又立舉主自首原罪之比蓋以所舉之人事未彰露卽許首原旣已彰露必坐以連坐之罪
此法苟行則所舉及受舉之人咸知懼矣

真宗詔每年終翰林學士以下常參官並同舉外任京朝官三班使臣幕職州縣官各一人明言治
行堪何任使或自己諳委或衆共推稱至令閣門御史臺計會催促如年終無舉官狀卽奏聞當行
責罰 臣按宋朝人君切於舉賢如此可以爲後世法

眞宗復舉官自代之制常參官及節度觀察防禦使刺史少尹畿赤令并七品以上清望官授訖三日內上表讓一人以自代在內者於閣門投下在外者附驛以聞其表付中書門下每官闕則以見舉多者量而授之 臣按此舉官自代之制誠能舉而行之吏兵二部各立簿籍二編次所讓表狀一以進內一以留司據此以爲銓用升擢之資其於進用賢才不爲無益

司馬光言於其君曰人之才性各有所能知人之難聖賢所重若專引知識則嫌於挾私難服衆心若止循資序則官非其人何以致治莫若使在位選官人舉所知然後克協至公野無遺賢矣欲乞以十科取士一曰行義純固可爲師表科二曰節操方正可備獻納科三曰智勇過人可備將帥科四曰公正聰明可備監司科五曰經術精通可備講讀科六曰學問該博可備顧問科七曰文章典麗可備著述科八曰善聽獄訟盡公得實科九曰善治財賦公私俱便科十曰練習法令能斷請讞科應職事官自尙書以下每歲於十科中舉三人中書省鈔錄舉主及所舉官姓名歲終不舉及人數不足按勅施行或遇在京及外方有事執政各隨所舉之科選差 臣按天下人才不拘拘於此十科況其各科之中所當用者亦有多寡不同臣愚以爲當如蘇洵所云書曰載采采舉人者當

明著其迹曰某人廉吏也嘗有某事知其廉某人能吏也嘗有某事知其能雖不必有非常之功而皆有可舉之狀其特曰廉能而已者不聽如此則取人之路廣當道者量其才器而用之庶乎其得人矣

英宗時詔中外臣僚於文資官內不以職位高下舉行實素著官政尤異可備升擢任使之人又於諸司使以下至三班使臣內舉其堪充將領及行陳任使之人司馬光言臣始聞之不勝慶忭既而議者皆言數年之前亦有此詔所舉甚衆未聞朝廷曾有所陞擢今茲蓋亦修故事飾虛名而已非有求賢之實也若果如此誠有何益乞將今來臣僚所舉之人隨其資叙各置一簿編其姓名留之禁中其副本降付所司遇文武官員有闕應係上件差遣者並乞於所舉官簿內資叙人中親加選擇點定臣按先所言數年前亦有此詔而今之所行亦是修故事飾虛名而已此切中後世詔令之弊非但求賢一事然也所謂置簿禁中一說尤爲切要但欲遇闕親爲點定似乎未善臣愚以爲必須待所司各擬以聞然後據此簿考其當否以點定之如此則人君於一世之人才皆有所據以知其人亦可因所舉之得失以知其人之賢否

蘇軾曰天下之吏不可以人人而知也故使長吏舉之又恐其舉之以私而不得其人也故使長吏任之他日有敗事則以連坐其過惡重者其罪均且夫人之難知自堯舜病之矣今日爲善而明日爲惡猶不可保況於十數年之後其幼者已壯其壯者已老而猶執其一時之言使同被其罪不已過乎天下之人仕而未得志也莫不勉強爲善以求舉惟其旣以致官而無憂是故蕩然無所不至方其在州縣之中長吏親見其廉謹勤幹之節則其勢不可以不舉又安知其終身之所爲哉一縣之長察一縣之屬一郡之長察一郡之屬職司者察其屬郡者也此三者其屬無幾耳其貪其廉其寬猛其能與不能不可謂不知也今其屬官有罪而其長不卽以聞他日有以告者則其長不過爲失察其去官者又以不坐夫職司察其屬郡縣各察其屬此非人之所不能而罰之甚輕又曰今之世所以重發贓吏者何也夫吏之貪者其始必詐廉以求舉舉者皆王公貴人其下者亦卿大夫之列以身任之居官莫不愛其同類等夷之人故其樹根牢固而不可動蓋以連坐者多故也如盜賊質劫良民以求苟免爲法之弊至於如此亦可變矣如臣之策以職司守令之罪罪舉官以舉官之罪罪職司守令今使舉官與所舉之罪均縱又加之舉官亦無如之何終不能知終身之廉者而

後舉特推之於幸不幸而已苟以其罪罪職司守令彼其勢誠有以督察之 臣按蘇軾此言蓋以職司守令於其屬有可督察之勢而欲以舉官之罪罪之夫職司守令在其人今日之已任則爲其屬其屬有罪而不察固有罪矣若夫舉官前日之所舉而今日有罪彼又何預哉臣愚以爲宜令舉主於初舉之時明具保任連坐之狀若其所舉之人有不如所舉許其於事情未露之前其實發覺之則原其繆舉之罪如此則舉人者有所恃而敢於薦揚受舉者有所畏而不敢改節矣

圖書編 薦舉

霍韜曰國初用薦舉爲重貢舉次之科舉爲輕今則科舉爲重貢舉次之薦舉不行矣故有行同盜跖心乎商賈者能染翰爲文俱隸仕籍此士風所以益偷也

春明夢餘錄 保舉

夫以天下之大人才之廣而僅取用于銓衡一司網疎甚矣欲使官得其人人盡其才舍保舉其奚由焉夫保舉與薦舉異薦舉者誠有所知一舉焉而臣之心畢矣保舉者舉其顯復保其微舉其始復保其終故薦舉者上世之法也保舉者晚世之法也明主好賢如渴而又慎之以不得已非薄視